

祗可軒詩集

管午思著

福可壽考
餘壽考

新安吳挺乾

序

乾隆戊申至乙卯凡八年余奉太夫人命受業於武進管韞山先生先生始官戶曹值

機庭旋授侍御自卯至申恒不得在邸第而從游者日益眾一時江左右英特之士半出管氏之門每課一文先生甲乙之次稍後輒惴惴焉受責是懼故當時京師有管氏家塾角藝如接仗之語先生有子字道明尤健於文或所構不稱先生意輒篝鐙復爲之竟夜不就寢必得當而後已每

廷試試差先生恒以道明故辭不與然諸同學掇高科去者先後無慮數十輩獨道明終不獲一舉京兆道明精力過人讀書屬文之暇又能練習簿書其父執及鄉前輩惜其才久

不試於用爲醵貲以知州注選其時先生已歸道山矣道明以他塗進旣悵悵懼不稱先志又次後不能卽除里居杜門始并力爲詩以抒其菀結慨慷懷人感遇之意蓋自諸同學治任嚮哭之後而道明詩日益工余從戶曹改官翰林旋爲盛京侍郎與道明相去愈遠而書疏往復無間已而道明以中歲不祿道明之子繩萊健於文嗇於遇復與道明同惟繩萊亦入貲爲縣令今官含山循聲大起此爲差勝耳余自江西移撫粵東繩萊走一介之使以道明遺詩刊本見寄並索弁言嗚呼吾何忍序吾道明之詩乎然不特十餘年夢影展卷如昨凡先太夫人爲余擇師之苦心與先師之所以爲教諸同學切磋砥礪之益因讀道明詩一一如在目睫而余且

垂垂老矣人生幾何聚散若此能無悲乎聊追昔輶書以報
繩萊繩萊益勉之家學不可一日忘也道光七年七月成格
序

候選知州管君家傳

同里趙懷玉撰

君管氏諱學洛字道明世爲武進人七世祖紹寧明禮部侍郎與三子鉉鍵鏐同殉勝國之難矣孫滋琪匿外家楊氏得生是爲鉉子娶於楊生子六以少子榆爲楊後後復本姓歷官刑部郎中君之高祖也曾祖復暲廣東歸靖場鹽課大使祖基承國子監生贈朝議大夫考世銘廣西道監察御史母張恭人君幼育於張九歲受經於大父卽異凡童侍御君觀政戶曹迎其親就祿朝議君倦於遠出命君侍大母與母北行侍御以文章名海內雖入官從遊者衆或假館受業每與同學角藝必研精覃思有所以勝之而後已旣而侍御入直機庭使車四出未暇內顧君處分家事不廢誦讀然婁園場

屋僂得復失侍御先後奉諱歸眷屬留京師料量薪水酬應
賓客皆井井及張恭人歿君方旋里而侍御卒於官君旣卜
宅兆念家無一椽卽歸無以栖止於是別營室宇一月而兩
事並舉然後入都扶護南下以父母之沒歲皆在午遂號午
思以致終身之慕焉初侍御存時同人以君久不第皆飲之
俾入貲爲知州迨免喪念先志未酬再應鄉試終見擯前後
蓋十一試矣又以新例疊開舊例貲員滯不能選里居者垂
十年凡侍御著錄皆梓以行世旣聞選期近遂俶裝北行行
六日驟以歐血疾卒於清江舟次時嘉慶十四年八月八日
也春秋四十九君敏而好學有幹局能爲人任事然鋒穎太
露人恒忌之爲詩多所寄託得主文誦諫之意尤工於詞君

處境雖順而科名仕宦未得一當遑遑蕉萃自傷故年甫四旬髮須盡白一病不起良以此歎予嘗以詩哭之曰君本入官翻送死世皆欲殺獨憐才又曰頗嫌處事機鋒銳卻喜承家編纂勤蓋紀實也娶同里董氏肅州知州熙女子一繩菜國子監生女二壻曰許復昌劉延和

論曰予交管氏三世矣未弱冠卽與侍御君有撫塵之好久而益密侍御晚遇旣登臺閣將有所展舒忽忽謝世君又未竟前人之緒傷已今君之子聰穎特達風氣日上知名之士多與之遊意蓄之極者其獲報更大耶

先府君行狀

府君管氏諱學洛字道明號午思先世居鳳陽宋南渡時始祖千十五公安撫常州愛其風俗淳厚遂卜居世爲華渡里鄉人七世祖紹孟明禮部侍郎與三子鉉鍵鏐同殉勝國之難一嫗一僕匿穉孫滋琪依中表楊氏賴以生因娶於楊實爲鉉之子生六子以少子與楊氏卽高祖刑部雲南司卽中諱楡初冒外家姓後始復焉曾祖諱復暉雍正壬子科舉人廣東歸靖鹽場大使累贈朝議大夫曾祖妣徐氏封恭人祖諱基承太學生以恥科舉搜檢之辱終身不思進取足迹不下樓者垂三十年凡書史皆手自抄錄無慮數十百種亦贈朝議大夫祖妣王氏封太恭人考諱世銘乾隆甲午科舉人

戊戌進士官廣西道監察御史授朝議大夫妣張氏封恭人
府君生而穎異幼隨張恭人育於外祖張公景超登宣場官
舍比九歲始歸太學公課之讀輒倍常童年十二三卽就外
塾塾師皆奇之十七娶吾母董氏是年侍御公成進士觀政
戶曹迎春屬就祿京邸府君偕吾母侍張恭人暨王太恭人
附糧艘北上庀飭井井爲老成所不及旣至京師初未有第
舍遷徙不常侍御公又以儉值不暇內顧府君晝則部分內
外家事夜輒鍵戶讀漏數商不倦居數年侍御公屢出按外
獄家事益繁多府君處之裕如誦讀如故也歲庚子辛亥侍
御公先後奉太學公及王太恭人諱去官始猶張恭人留居
京邸繼以王太恭人憂張恭人亦歸里府君偕吾母處都下

所居屋之半取其值以佐薪水凡侍御公交舊之京者皆
酬接禮無少缺人咸以此服府君才先是侍御公以府君應
北闈若爲同考則不得入遂不預差試府君久不第益邃志
經史積十餘年無懈意侍御公以文章爲一代宗匠所在多
從游之士四方來者恒假館邸寓哦誦之聲東西舍相徹府
君因與共相砥礪凡一藝出必沉精覃思不勝不止同人皆
無以尙也戊午夏五月張恭人疾終京邸府君扶輓南歸是
年冬十一月侍御公亦歿於官惟吾母及不孝繩萊在京府
君聞信卽爲張恭人營兆穴以家累將歸祖居不能悉容又
別構屋宇經一月而二事並舉乃星奔入都奉侍御公柩以
歸方侍御公未歿時府君以不第故同人皆資之援用楚例

爲知州迨侍御公歿府君痛先人期望之意終以不獲一科
爲憾服闋復兩應辛酉甲子秋試卒不得售至是蓋十一黜
矣府君喟然曰命也吾亦可以告吾父矣久之新例疊開舊
例貲員悉滯不得選府君旣已無餘財自知所遇多不偶因
鄉居不更思出幾十年凡侍御公所著皆梓以行世嫁兩女
爲不孝繩萊娶婦府君之心力瘁矣歲丁卯吾鄉大饑邦人
捐貲以賑餓者府君與同里洪先生亮吉力主之勉客獎善
勸說百端其事終獲以成雖嫌怨交訐羣疑謗集府君不顧
也不孝繩萊以戊辰冬自京應試歸復以謀食去之都下得
府君選期於選人馳書歸告府君以八月初一日就道去家
八日以咯血歿于清江舟次嗚呼痛哉府君早衰鬢鬢盡白

足數患卑濕氣屢藥弗效至是稍便于行不料變生倉卒且在道路間也嗚呼痛哉府君明敏有達識伉直好面折人過見後生能文之士譽之不容口人恒樂交府君而亦以此多忌之居京師曰有故人高君逋負數百金卒於旅舍府君立召其子至焚所書券反助其喪歸生平喜爲人任事人恒負之如高君焚券事甚衆性純孝遭侍御公張恭人喪淚下盡血衿袖爲赤歸里後常慨不用於世抱志悒悒爲詩宗宋楊誠齋陸放翁寄意深遠中多自傷之意有祇可軒半人集八卷的的詞三卷文集一卷雜錄六卷府君生於乾隆二十六年十一月十五日卒於嘉慶十四年八月初八日年四十有九候選知州例授奉直大夫娶吾母董氏例封宜人甘肅肅

州知州熙女子一繩萊國子監生娶金壇于氏女二長嫁許
復昌次嫁劉延和皆同里人孤子繩萊泣血謹狀

祇可軒刪餘稿卷一

武進管學洛午思著

孫樂重校刊

長生巷新居

居人豈有東長生陋巷何期協美名趙獻室兼歌哭頌太常
廳爲子孫成題門鳳悵梧岡影舊居先高祖書齋名據梧鄰屋烏非柏府
聲此後易人知幾世定巢聊比谷中鶯

驚從秋水屬遼東木榻穿來夢蝶空

新居舊爲莊氏宅

華屋山邱雙

眼內桑田滄海一門中烏衣休怪渾無燕卓帽原難更有龍
慚愧旁人誇屋潤青氈誰識舊家風

鴻安新阡

十里松光萬嶺烟墓門剛傍一菴前不愁他日無歸路未必

今生表到阡出土石知何代佛

土中多石
羅漢像

眠牛地本幾家田

兒孫後事誰能料莫向形家叩萬全

庚申三月上冢遇雨

自有清明節今纔識斷魂紛紛看雨腳點點是啼痕此處通
泉路無方達寢門何心似行客覓酒杏花村

上丹徒鳳頭山馬灣山祖塋

生來四十年始拜墓門前知否家中落還祈澤再延計程才
隔夜廢禮是誰先此後清明節重當設祭田

十月朔上冢

去家將百里始得傍吾親有石皆成佛

土中石多
成佛像

除僧不見

人湖光千頃碧鳥語四時春寂寞空山裏真堪老此身